

Na osnovu čl. 24. i 62. Zakona o državnoj službi u institucijama Bosne i Hercegovine ("Službeni glasnik BiH", br. 19/02, 35/03, 4/04, 17/04, 26/04 i 37/04) i člana 10. Odluke o načinu i programu polaganja javnog i stručnog ispita za lica koja se postavljaju za državne službenike u institucijama Bosne i Hercegovine ("Službeni glasnik BiH", broj 20/03), Agencija za državnu službu, donosi

## **ODLUKU**

### **O UTVRĐIVANJU KRITERIJA ZA ODREĐIVANJE VISINE NAKNADA ČLANOVIMA KOMISIJA I DRUGIM LICIMA U VEZI SA POLAGANJEM JAVNOG I STRUČNOG ISPITA U INSTITUCIJAMA BOSNE I HERCEGOVINE**

#### **Član 1.**

1. Ovom odlukom utvrđuju se kriteriji za određivanje visine naknada koje se isplaćuju članovima komisija za izbor državnih službenika, stručne komisije za polaganje javnog ispita, kao i licima angažovanim kao izvođačima obuke za polaganje javnog ispita.
2. Akte o imenovanju komisija i određivanju visine naknada donosi Agencija za državnu službu (u daljem tekstu: Agencija).

#### **Član 2.**

1. Naknada za rad članovima komisija za izbor državnih službenika (u daljem tekstu: komisija za izbor) jednaka je za sve članove jedne komisije za izbor.
2. Visina naknade licima iz stava 1. ovog člana veže se za broj kandidata koji pristupe i okončaju pismeni dio stručnog ispita, a ako se pismeni dio ispita (u skladu sa propisima) ne održava, tada se visina naknade veže za broj kandidata koji pristupe intervjuu.
3. U skladu sa prethodnim stavom, visina naknade određuje se članu komisije za izbor prema sljedećem:
  - od jednog do pet kandidata, 50 konvertibilnih maraka;
  - od šest do 15 kandidata, 100 konvertibilnih maraka;
  - od 16 do 30 kandidata, 200 konvertibilnih maraka;
  - 31 i više kandidata, 300 konvertibilnih maraka.

#### **Član 3.**

1. Ukoliko je tokom rada došlo do zamjene člana komisije za izbor, posebno se određuje koliku će naknadu dobiti razriješeni, a koliku novoimenovani član, s tim što je ukupna naknada jednaka naknadi jednog člana komisije za izbor koji je cijelo vrijeme učestvovao u radu komisije.
2. Aktom o imenovanju komisije za izbor neće se određivati visina naknade.

#### **Član 4.**

1. Članovima stručne komisije za polaganje javnog ispita (u daljem tekstu: stručna komisija) naknada se obračunava u zavisnosti od broja izrađenih, odnosno ažuriranih pitanja za polaganje javnog ispita, te vremenskog perioda praćenja propisa relevantnih za polaganje javnog ispita.

2. U skladu sa prethodnim stavom, visina naknade određuje se članu stručne komisije prema sljedećem:
  - za izradu ili ažuriranje jednog pitanja sa četiri opcijska odgovora, naknada iznosi pet konvertibilnih maraka po pitanju;
  - za praćenje propisa iz konkretne oblasti (predmeta) vezane za polaganje javnog ispita, naknada iznosi 50 konvertibilnih maraka tromjesečno.
3. Aktom o imenovanju stručne komisije preciznije će se definisati konkretne obaveze njenih članova, kao i način kontrole izvršenih poslova.

#### Član 5.

Licima koja izvide obuku za polaganje javnog ispita isplaćuje se naknada od 50 konvertibilnih maraka po satu izvedene obuke.

#### Član 6.

1. Visina naknade, u skladu sa odredbama ove odluke, u svakom pojedinom slučaju utvrđuje se posebnim rješenjem.
2. Članovima jedne komisije naknada se utvrđuje jednim rješenjem, ako ne postoji potreba za pojedinačno izdatim rješenjima.

#### Član 7.

Odredbe ove odluke koje se odnose na naknade članovima komisija za izbor i način isplate naknade licima angažovanim na izvođenju obuke za polaganje javnog ispita, primjenjivat će se počev od 1.11.2004. godine.

#### Član 8.

Ova odluka stupa na snagu danom donošenja i objavit će se na oglasnoj tabli Agencije.

Broj: 03-34-791/04  
4. oktobra 2004. godine  
Sarajevo

